

Հայաստանի Հանրապետության Արագածոտնի մարզի

խորհրդի նիստի

ք. Աշտարակ

29. 01. 2025թ. ժամը 15<sup>00</sup>

Մասնակցում էին՝

Ս. Մովսիսյան	ՀՀ Արագածոտնի մարզպետ
Հ. Գուլյան	ՀՀ Արագածոտնի մարզպետի տեղակալ
Մ. Հովհաննիսյան	ՀՀ Արագածոտնի մարզպետի տեղակալ
Հ. Գևորգյան	ՀՀ Արագածոտնի մարզպետի աշխատակազմի գլխավոր քարտուղար
Ա. Գրիգորյան	ՀՀ Արագածոտնի մարզպետի խորհրդական
Վ. Հարությունյան	ՀՀ Արագածոտնի մարզպետի խորհրդական
Մ. Դավուդյան	ՀՀ Արագածոտնի մարզպետի օգնական

Մարզպետի աշխատակազմի ստորաբաժանումների ղեկավարներ

Մարզի համայնքների ղեկավարներ

Ուժային կառույցի ներկայացուցիչներ

Լրատվամիջոցների ներկայացուցիչներ:

Օրակարգում՝

1. Մարզի համայնքների 2024թ. սեփական եկամուտների հավաքագրման աշխատանքների վերաբերյալ:
2. 2025թ. համայնքների բյուջեների կազմման գործընթացի վերաբերյալ:
3. Մարզի համայնքների տնտեսական և սոցիալական ենթակառուցվածքների զարգացմանն ուղղված սուբվենցիոն ծրագրերի ընթացքի և 2025 թվականի համար ներկայացված ծրագրերի վերաբերյալ ամփոփ տեղեկատվություն:
4. Մարզպետի աշխատակազմի պատվիրատվությամբ մարզում ՀՀ պետական բյուջեի միջոցներով իրականացվող ծրագրերի վերաբերյալ տեղեկատվություն:
5. Մարզում 2024 թ. գյուղատնտեսության ոլորտում բերքատվության վերաբերյալ:
6. Մարզի համայնքների աշխատակազմերի և համայնքային կազմակերպությունների հաշվեկշիռներում առկա մարդատար ավտոմեքենաների կրճատման վերաբերյալ:
7. Մարզում իրականացվող դպրոցաշինական ծրագրերի մասին:
8. 2024 թվականի սուբվենցիոն ծրագրերի մշտադիտարկման խմբի կատարած աշխատանքների արդյունքների վերաբերյալ:
9. Այլ հարցեր:

**Նիստի բացման** խոսքում մարզպետ Ս. Մովսիսյանը ներկայացրեց ՀՀ ԱԱԾ Արագածոտնի մարզային վարչության նորանշանակ պետ, գնդապետ Ռ. Բոխյանին՝ մաղթելով նրան բարի և խաղաղ ծառայություն, արդյունավետ համագործակցություն:

Մարզպետը ներկաներին տեղեկացրեց նաև, որ ՀՀ ՊՆ ՀՁԿ Արագածոտնի մարզի զինվորական կոմիսարիատը ճանաչվել է 2024 թվականի լավագույն զինկոմիսարիատ: Այդ առիթով շնորհավորեց ՀՀ Արագածոտնի մարզի զինվորական կոմիսար Ս. Մեջլումյանին և



շնորհակալություն հայտնեց զորահավաքի կազմակերպման հետ առնչություն ունեցող բոլոր կառույցներին աշխատանքները պատշաճ կատարելու համար:

### ***Լսեցին՝***

#### ***1. Մարզի համայնքների 2024թ. սեփական եկամուտների հավաքագրման աշխատանքների վերաբերյալ /զեկուցող՝ ֆինանսական վարչության պետ Ն. Գալստյան/:***

*/Ցուցանիշները կցվում են/:*

Ն. Գալստյանը տեղեկացրեց, որ սեփական եկամուտների հավաքագրման ցուցանիշը 2024 թվականին կազմել է 104,0%: Աշտարակ՝ 101,4%, Շամիրամ՝ 216,3%, Ապարան՝ 108,4%, Ալազյազ՝ 107,5%, Մեծաձոր՝ 111,7%, Արևուտ՝ 101,8%, Թալին՝ 110,4%, Ծաղկահովիտ՝ 89,9%: Ցածր ցուցանիշներ են արձանագրվել Ծաղկահովիտ համայնքում:

***Մարզպետ Սերգեյ Մովսիսյանը հանձնարարեց*** ՏԿ և ՏԻՀ վարչության պետ Հ. Ասատրյանին համայնքների ղեկավարների աջակցությամբ շարունակական աշխատանքներ տանել, իսկ հավաքագրումը շարունակել նույն մեխանիզմով՝ ապահովելով հավաքագրման պլանավորված եռամսյակային ցուցանիշները: Ծաղկահովիտ համայնքի ղեկավարին առաջարկվեց հետևողական աշխատանքներ տանել ցածր ցուցանիշները մյուս տարի բարձրացնելու ուղղությամբ:

#### ***2. 2025թ. համայնքների բյուջեների կազմման գործընթացի վերաբերյալ /զեկուցող՝ ֆինանսական վարչության պետ Ն. Գալստյան/:***

Ն. Գալստյանը տեղեկացրեց, որ համայնքներին տրամադրվող դոտացիաները 2018 թ. համեմատությամբ 2025 թ. աճել են եռակի՝ մոտ 5 մլրդ դրամով: Ներկայացրեց տեղեկատվություն ՀՀ համայնքների բյուջեներին «Ֆինանսական համահարթեցման մասին» ՀՀ օրենքով դոտացիաներ տրամադրելու նպատակով նախատեսված հատկացումների ընդհանուր բաշխման ծավալի վերաբերյալ:

Զեկուցվեց, որ բոլոր 8 համայնքներն էլ կազմել և հաստատել են իրենց բյուջեները ավագանու որոշմամբ: Ստացել են անհրաժեշտ խորհրդատվություն և այդ գործում որևէ խնդիր չկա:

#### ***3. Մարզի համայնքների տնտեսական և սոցիալական ենթակառուցվածքների զարգացմանն ուղղված սուբվենցիոն ծրագրերի ընթացքի և 2025 թվականի համար ներկայացված ծրագրերի վերաբերյալ ամփոփ տեղեկատվություն /զեկուցող՝ քաղաքաշինության, հողաշինության և ենթակառուցվածքների կառավարման վարչության պետ Հ. Ստեփանյան/:***

*/Զեկուցողը կցվում է/:*

Զեկուցվեց, որ 2022 թվականին հաստատված Արագածոտնի մարզի 8 համայնքների տնտեսական և սոցիալական ենթակառուցվածքների զարգացմանն ուղղված ընդհանուր 4183 420 791 ՀՀ դրամ նախնական արժեքով 19 սուբվենցիոն ծրագրերից, այս պահին ավարտվել են 17 ծրագրեր: Տեղեկատվություն ներկայացվեց ընթացքի մեջ գտնվող Աշտարակ քաղաքի թիվ 4 «Հասմիկ մանկապարտեզ» ՀՈԱԿ-ի շենքի հիմնանորոգում և բակային տարածքների բարեկարգման աշխատանքների և Ապարան համայնքի Արագած, Շենավան բնակավայրերում նոր մանկապարտեզների կառուցման վերաբերյալ: 2022 թվականի թվով 19 սուբվենցիոն ծրագրերի համար պետական բյուջեից ֆինանսավորման չափը կազմել է՝ 1 832 028 500 դրամ:

**2023թ.** ՀՀ Արագածոտնի մարզում կառավարության կողմից իրականացվող համայնքների տնտեսական և սոցիալական ենթակառուցվածքների զարգացմանը ուղղված սուբվենցիոն ծրագրերի շրջանակներում հայտերի գնահատման միջգերատեսչական հանձնաժողովի քննարկմանն է ներկայացվել թվով 23 սուբվենցիոն ծրագրերի ամբողջական



փաթեթներ: Միջգերատեսչական հանձնաժողովի կողմից հավանության է արժանացել թվով 21 ծրագիր՝ ընդհանուր՝ 7 430 350 338 ՀՀ դրամ արժեքով: Վերջնական հաստատվել է 20 ծրագիր՝ 6 045 271 911 ՀՀ դրամ արժեքով: Ներկայացվեց տեղեկատվություն ընթացքի մեջ գտնվող և ավարտված 2023 թվականի սուբվենցիոն ծրագրերի մասին՝ ըստ համայնքների և ոլորտների:

2024 թվականին ՀՀ Արագածոտնի մարզի համայնքների կողմից ներկայացվել է սուբվենցիոն ծրագրերի 23 ամբողջական փաթեթ: ՀՀ Արագածոտնի մարզպետի աշխատակազմի կողմից միջգերատեսչական հանձնաժողովի քննարկմանը ներկայացված փաթեթներից դրական եզրակացություն է ստացել 16 ծրագիր: Ընդհանուր 16 սուբվենցիոն ծրագրերի պայմանագրային արժեքը կազմում է **8 329 562 363** դրամ: Տեղեկատվություն ներկայացվեց ծրագրերի մասին ըստ ոլորտների: 2024 թվականի սուբվենցիոն ծրագրերից այժմ միայն ընթացք է տրվել Թալին քաղաքում ջրահեռացման համակարգի կառուցման աշխատանքներին: Մնացած բոլոր ծրագրերին, եղանակային պայմաններից ելնելով, դեռևս ընթացք չի տրվել:

2025 թվականի ՀՀ Արագածոտնի մարզի համայնքների ենթակառուցվածքների զարգացմանն ուղղված սուբվենցիայի ծրագրերի մասով ներկայացվեց, որ 2025 թվականին ՀՀ Արագածոտնի մարզի համայնքների կողմից ներկայացվել է սուբվենցիոն ծրագրերի 22 ամբողջական փաթեթ՝ ընդհանուր՝ 10 890 342 837 դրամ արժողությամբ:

ՀՀ Արագածոտնի մարզպետի աշխատակազմի կողմից միջգերատեսչական հանձնաժողովի քննարկմանն է ներկայացվել թվով 7 սուբվենցիոն ծրագրերի փաթեթներ: Ընդհանուր՝ 3 145 253 497 դրամ: Մանրամասն տեղեկատվություն ներկայացվեց ծրագրերի ուղղվածության և բաշխվածության վերաբերյալ:

**Մարզպետ Ս. Մովսիսյանի կողմից** կարևորվեց մարզի համայնքների մանկապարտեզների հարցը: **Հանձնարարեց** քաղաքաշինության, հողաշինության և ենթակառուցվածքների կառավարման վարչության պետ Հ. Ստեփանյանին հետևողական լինել այդ ուղղությամբ տարվող աշխատանքների նկատմամբ, սեղմ ժամկետում հավաքագրել համայնքներում մանկապարտեզների անհրաժեշտության ու կարևորության մասին տեղեկատվությունը: Եթե համայնքն ունի մանկապարտեզի կառուցման, հիմնանորոգման կամ վերանորոգման ծրագրեր, ապա նշված ծրագրերը՝ որպես սուբվենցիոն ծրագիր, կարող են ներկայացվել միջգերատեսչական հանձնաժողովի քննարկմանը:

**4. Մարզպետի աշխատակազմի պարզաբանությամբ մարզում ՀՀ պետական բյուջեի միջոցներով իրականացվող ծրագրերի վերաբերյալ տեղեկատվություն /զեկուցող՝ քաղաքաշինության, հողաշինության և ենթակառուցվածքների կառավարման վարչության պետ Հ. Ստեփանյան/:**  
*/Զեկուցող կցվում է/:*

Զեկուցվեց, որ ՀՀ պետական բյուջեի միջոցներով «Համայնքների միավորմանը չմասնակցած, ինչպես նաև փոքր համայնքներում ենթակառուցվածքների զարգացմանն ուղղված նպատակային ծրագրերի» շրջանակում իրականացվում են ՀՀ Արագածոտնի մարզի Շամիրամ համայնքի գազիֆիկացման և Մեծածոր համայնքի Օթևան բնակավայրի միջհամայնքային ճանապարհի հիմնանորոգման աշխատանքները: Նախատեսվում է Շամիրամ համայնքում կառուցել 15,852 կմ երկարությամբ գազատար և հիմնանորոգել Կաքավաձորից դեպի Օթևան տանող ավտոճանապարհի 1.3 կմ հատվածը:



Մրցույթների արդյունքում պատվիրված նախագծանախահաշվային փորձաքննություն անցած փաստաթղթերի հիման վրա հայտարարվել էր կապալային աշխատանքների և տեխնիկական հսկողության իրականացման մրցույթներ, որոնց ամփոփումից և համապատասխան ընթացակարգից հետո ներկայացվել է ՀՀ կառավարությանը: 2024 թվականին մրցույթների արդյունքում պատվիրված նախագծանախահաշվային փորձաքննություն անցած փաստաթղթերի հիման վրա հայտարարվել էր մարզային նշանակության 92 կմ ավտոճանապարհների գծանշման և կահավորանքով համալրման մրցույթ: Մրցույթի արդյունքում կնքվել էր կապալային աշխատանքների իրականացման պայմանագիր՝ 82.140.000 դրամ պայմանագրային արժեքով: Աշխատանքները ընթացքի մեջ են, ավարտը նախատեսված է մինչև 2025 թվականի ապրիլի 1-ը: 2025թ-ին ևս նախատեսվում է իրականացնել մարզային ավտոճանապարհների կահավորանքի և գծանշման մրցույթ՝ ընթացիկ տարվան համապատասխան գումարների բաշխման արդյունքում գոյացող մոտավորապես 55մլն ՀՀ դրամ գումարի շրջանակում:

**Մարզպետը կարևորեց** մարզում իրականացվող բոլոր շինարարական աշխատանքների վերահսկման գործընթացը և առաջարկեց համայնքների ղեկավարներին նույնպես ընդգրկվել այդ գործում: Գծանշման աշխատանքներում բացթողումները բացառելու նպատակով, անհրաժեշտ փոփոխությունների կամ լրացումների դեպքում մեկշաբաթյա ժամկետում առաջարկություններ ներկայացնել մարզպետի տեղակալ Մ. Հովհաննիսյանին:

**5. Մարզում 2024 թ. գյուղատնտեսության ոլորտում բերքավորության վերաբերյալ /զեկուցող՝ գյուղատնտեսության և շրջակա միջավայրի պահպանության վարչության պետ Յու.Ազարյան/**

*/Զեկույցը կցվում է/:*

Տեղեկատվություն ներկայացվեց մշակաբույսերի արտադրության վերաբերյալ 2024 թվականի դրությամբ /հացահատիկ և հատիկընդեղեն, կարտոֆիլ, բանջարեղեն, պտուղ-հատապտուղ, խաղող, խոտ/: Նշվեց, որ ցանքային տարածությունը 2024 թ.-ին կազմել է 24851,9հա:

Զեկույցվեց, որ ՀՀ-ում գյուղատնտեսական տեխնիկայի լիզինգի աջակցության ծրագրի շրջանակում 01.12.2024 դրությամբ ձեռք է բերվել 71 միավոր գյուղատնտեսական տեխնիկա շուրջ 194.1 մլն դրամ արժողությամբ: Ծրագրի մեկնարկից տրամադրված լիզինգի համար 2024 թվականին՝ դեկտեմբերի 1-ի դրությամբ սուբսիդավորման գումարը կազմել է շուրջ 98.4 մլն դրամ: Գյուղատնտեսության ոլորտում ապահովագրական համակարգի ներդրման փորձնական ծրագրի շրջանակում 2024 թվականի գյուղատնտեսական տարվա համար Արագածոտնի մարզում ապահովագրական ընկերությունների կողմից վաճառվել է 5 ապահովագրության պայմանագիր՝ 7 հա ընդհանուր մակերեսով տարածքի համար: Գյուղատնտեսական հումքի մթերումների նպատակով տրամադրվող վարկերի տոկոսադրույքների սուբսիդավորման ծրագրի շրջանակներում 2024 թվականի նոյեմբերի 30-ի դրությամբ հաստատվել է Արագածոտնի մարզի շահառուների կողմից ներկայացված 16 հայտ 701.6 մլն դրամի չափով, կնքվել է 397 հումքի գնման պայմանագիր, իսկ սուբսիդավորման գումարը կազմել է 79.4 մլն դրամ: ՀՀ կառավարության 2018 թվականի հուլիսի 19-ի N 893-Լ որոշմամբ հաստատված ՀՀ ագրոպարենային ոլորտի սարքավորումների լիզինգի աջակցության ծրագրի շրջանակներում 2024 թվականի նոյեմբերի 30-ի դրությամբ հաստատվել է Արագածոտնի մարզի շահառուների կողմից ներկայացված 7 հայտ 200.6 մլն դրամի չափով, իսկ սուբսիդավորման գումարը կազմել է 494.5 մլն դրամ: ՀՀ կառավարության 2022 թվականի օգոստոսի 4-ի N 1220-Լ որոշմամբ հաստատված Հայաստանի Հանրապետությունում գյուղատնտեսական նշանակության հողերի միավորմանը (կոնսոլիդացիային) աջակցության ծրագրի շրջանակում 2024 թվականին «ՍԼԳ ԱԳՐՈ» ՓԲԸ-ի հետ կնքվել է գյուղատնտեսական նշանակության հողերի միավորման 7 պայմանագիր և ըստ



յուրաքանչյուրի նախատեսվում է միավորել 5-30 հա հողամասեր: ՀՀ կառավարության 2019 թվականի նոյեմբերի 14-ի N 1612-Լ որոշմամբ հաստատված փոքր և միջին ջերմատնային տնտեսությունների ներդրման աջակցության ծրագրի շրջանակում 2024 թվականին 1 շահառուի 3000 մ<sup>2</sup> կառուցված ջերմատնային տնտեսության համար հատկացվել է 30,0 մլն ՀՀ դրամ փոխհատուցում: ՀՀ կառավարության 2021 թվականի հունիսի 3-ի N 927-Լ որոշմամբ հաստատված ՀՀ-ում ինտենսիվ այգեգործության զարգացման, արդիական տեխնոլոգիաների ներդրման և ոչ ավանդական բարձրարժեք մշակաբույսերի արտադրության խթանման պետական աջակցության 2021-2025 թվականների ծրագրի շրջանակում 2024 թվականին փոխհատուցման բաղադրիչով հիմնվել է 61,5 հա ինտենսիվ այգի փոխհատուցման գումարը կազմել է 1,06 մլրդ ՀՀ դրամ, իսկ 13 հա տարածքում ներդրվել է ոռոգման արդիական համակարգեր, որի փոխհատուցման գումարը կազմել է 12,3 մլն ՀՀ դրամ: ՀՀ կառավարության 2019 թվականի մարտի 29-ի N 361-Լ որոշմամբ հաստատված Հայաստանի Հանրապետությունում խաղողի, ժամանակակից տեխնոլոգիաներով մշակվող ինտենսիվ պտղատու այգիների և հատապտղանոցների հիմնման համար պետական աջակցության ծրագրի շրջանակում 2024 թվականին հիմնվել է 5 հա ինտենսիվ այգի, որի փոխհատուցման գումարը կազմել է 40,6 մլն ՀՀ դրամ:

**Մարզպետ Ս. Մովսիսյանը հանձնարարեց** գյուղատնտեսության և շրջակա միջավայրի պահպանության վարչության պետ Յու.Ազատյանին ապահովել մարզում ՀՀ կառավարության կողմից առաջարկվող բոլոր ծրագրերի իրագրելուն՝ սերտ համագործակցելով ՀՀ էկոնոմիկայի նախարարության հետ:

**6. Մարզի համայնքների աշխատակազմերի և համայնքային կազմակերպությունների հաշվեկշիռներում առկա մարդատար ավտոմեքենաների կրճատման վերաբերյալ /զեկուցող՝ ՏԿ և ՏԻՀ վարչության պետ Հ. Ասատրյան/:**

*/Զեկույցը կցվում է/:*

Հ. Ասատրյանը զեկույցեց, որ մարզի համայնքների աշխատակազմերի և համայնքային կազմակերպությունների հաշվեկշիռներում առկա մարդատար ավտոմեքենաների կրճատման գործընթացը սկսվել է. Աշտարակ համայնքում առկա է 12 մարդատար ավտոմեքենա, որից կրճատվելու է 10-ը: Ծաղկահովիտ համայնքում առկա է 2 մարդատար ավտոմեքենա, կրճատվելու է 1-ը, Շամիրամ, Ալագյազ, Մեծաձոր համայնքներում առկա է 1-ական մարդատար ավտոմեքենա, որից Մեծաձոր համայնքինը շահագործման ենթակա չէ և սահմանված կարգով դուրս կգրվի համայնքի հաշվեկշռից: Թալին համայնքում առկա 17 մեքենայից կկրճատվի 15-ը, իսկ Ապարան համայնքում՝ 5-ից 3-ը:

**Մարզպետ Ս. Մովսիսյանը** գոհունակություն հայտնեց, որ մարզի համայնքի ղեկավարները արձագանքել են ՀՀ վարչապետի կոչին և աշխատանքներն արագ ու սահուն կազմակերպել:

**7. Մարզում իրականացվող դպրոցաշինական ծրագրերի մասին /զեկուցող՝ մարզպետի խորհրդական Ա. Գրիգորյան/ :**

*/Զեկույցը կցվում է/:*

Զեկույցվեց, որ ՀՀ Կառավարության «2021-2026 թվականներին կառուցվող, վերակառուցվող, հիմնանորոգվող 300 դպրոց 500 մանկապարտեզ ծրագրում» ներառված 25 դպրոցներին վերջին երեք ամսում ավելացել է նաև Կաքավաձորի միջնակարգ դպրոցը: Նշված 26 դպրոցներից 1-ի կառուցումն ավարտվել է, 21-ը կառուցման փուլում են, 1-ում շուտով կսկսվեն շինաշխատանքները, իսկ 3 դպրոցներում դեռևս մրցույթներ չեն հայտարարվել:

Նշվեց, որ մարզպետի հանձնարարությամբ ևս 12 դպրոցի ծրագիր ներկայացվել է 2026 թվականից հետո ՀՀ կառավարության դպրոցաշինական ծրագրերում ներառելու նպատակով: Կառավարության հաստատմանն է ուղարկվել մարզի դպրոցներից հավաքագրված կարիքները՝ շենքային պայմանների բարելավման և գույքի հետ կապված: 2 դպրոցի



տանիքների վերանորոգման համար մարզպետի աշխատակազմը դիմել է ԿԳՄՍՆ արագ արձագանքման ֆոնդին:

Մարզի դպրոցների լաբորատորիաների հիմնման աշխատանքները նույնպես շարունակվում են: ԿԳՄՍ նախարարության ԾԻԳ-ի և ՀՀ Արագածոտնի մարզպետի աշխատակազմի համագործակցությամբ մարզի 44 դպրոցների լաբորատորիաների սենյակների նորոգման շուրջ 96 մլն դրամ արժողությամբ աշխատանքներն ավարտվել են: Այժմ ընթանում են լաբորատորիաների գործարկմանն ուղղված աշխատանքները, մասնավորապես լաբորատոր նյութերի համալրման, աշխատակիցներով ապահովման աշխատանքները: Ընդհանուր առմամբ մարզի դպրոցներում հիմնվել են բնագիտական առարկաների 61 լաբորատորիաներ:

**Մարզպետ Ս. Մովսիսյանը կարևորեց** իրականացված աշխատանքները և առաջարկեց առաջիկայում այցելություններ կազմակերպել դպրոցներ՝ լաբորատորիաների աշխատանքների արդյունավետությունը ստուգելու համար:

**8. 2024 թվականի սուրվենցիոն ծրագրերի մշտադիտարկման խմբի կազմարած աշխատանքների արդյունքների վերաբերյալ /զեկուցող՝ մարզպետի խորհրդական Ա. Գրիգորյան/ :**  
*/Զեկույցը կցվում է/:*

Ներկայացվեց տեղեկատվություն մարզպետին կից ստեղծված մշտադիտարկման խմբի կատարած աշխատանքների մասին: Նշվեց, որ հանձնաժողովի անդամների կողմից 2024 թ. սուրվենցիոն ծրագրերը դիտարկելու նպատակով իրականացվել է 341 այց: Այցերի ընթացքում մշտադիտարկման արդյունքում, արձանագրված խնդիրները երկու ուղղությամբ են իրականացվել՝ կատարված աշխատանքների որակի ապահովում և կատարված աշխատանքների նախագծային համապատասխանություն: Բոլոր արձանագրված խնդիրները իրազեկվել են շտկման նպատակով:

**Մարզպետի կողմից առանձնացվեց** մշտադիտարկման աշխատանքների կարևորությունը: Նշվեց, որ բոլոր աշխատանքները միտված են օգնելու, թեթևացնելու խնդիրների լուծման գործընթացը: Առաջարկվեց համայնքի ղեկավարներին արդյունավետ աշխատանքի համար միշտ համագործակցել մարզպետի աշխատակազմի և մշտադիտարկման հանձնաժողովի հետ:

**Այլ հարցերի** շրջանակում Շամիրամի համայնքի ղեկավարի կողմից բարձրացվեց համայնքի հարակից միջպետական ճանապարհի վերանորոգման հարցը, ինչպես նաև Շամիրամի դպրոցի սանհանգույցի և մարզադահլիճի հիմնանորոգման խնդիրը: Մարզպետի կողմից տրվեցին համապատասխան հանձնարարություններ:

Ամփոփելով մարզի խորհրդի նիստը՝ մարզպետ Ս. Մովսիսյանը շնորհակալություն հայտնեց ներկաներին համատեղ և արդյունավետ աշխատանքի համար:

**ՀՀ Արագածոտնի մարզպետ՝**



**Սերգեյ Մովսիսյան**